

臺灣戰紀



線  
733.28  
8266  
11

舊



由國家圖書館數位化、典藏

序

自古國之將亡。必先棄民。棄民者民亦棄之。棄民斯棄地。雖以祖宗經營二百年疆土。煦育數百萬生靈。而不惜軼斷於一旦。以偷目前一息之安。任天下洶洶而不顧。如割臺灣是已。當鄭氏之開拓臺灣也。北不踰諸羅。南不踰鳳山。其地不及今五之一。兵二萬。番二三十萬。其衆不及今十之一。而西驅荷蘭。東敵倭人。南控呂宋。北犯大清。而有餘。而今負之以清國之大。重之以本島之庶。而不能有爲。反舉而畀之島國。天下孰有痛于此者乎。唐棄維州。宋棄靈州。明棄三衛。乃陷於強敵而後棄。初非以行成也。况一州不過兵民數萬。孰有若臺灣數百萬乎。且唐失維州。以牛僧孺



德裕成功也。宋失靈州。以孤懸夏竟。救援不繼也。明之大寧。則以兀良哈從成祖出篡逆之兵。予以酬勞也。蓋猶石晉之去燕雲也。其後興和軍弛。開平以孤立徙塞內。亦非故棄邊地。如臺灣之齋寇竄也。自和約換。敵軍來。臺灣沈沈無聲。天下皆以葢爾一島俯首帖耳。屈服外國淫威之下矣。而烏知民主唐景崧一去。散軍民軍。血戰者六閱月。提督劉永福再去。民衆土匪。血戰者五越年。靡無盡英毅之驅於燬火刀戚之中。而無名無功。此吾人所當汲汲表襮者也。然使其時而有一國一人焉。稍稍接濟其間。則反敗爲功。若荷蘭之視比利時。希臘之離土耳其。未可知也。平壤有若是戰焉。高麗蓋可不失。鴨綠江有若是戰焉。遼東亦可不失。而何有

35  
673.22  
8266  
11

割遼割臺之事也。嗟乎。危急而割地以圖存者。歐洲亦時有之矣。法蘭西割奧爾沙士羅連二州於德也。前相麥亞讀和約大哭不能終。臺灣繫七省屏藩。當東海南海之衝。即黃海渤海亦握其扼。非若奧羅二州介在德法一隅之比。而李傅相等乃夷然漠然。視割臺如唾涕之委地。且要朝廷飭各省毋陰濟。是尙爲有心肝乎。唐之徵。猶復河湟。明之季。猶窺河套。見明史曾統傳宋之將南。猶不忘燕雲。法社奧羅二州之神。佩喪章四十年而不去。而清國之視臺灣何如乎。京師不以爲足趾。閩越不以爲唇齒。而使沈淪水深火熱之中。長属侏離。憔悴而靡有所底。是則可爲臺灣哀也夫。是則可爲故國哀也夫。

序



光緒柔兆敦牂之歲洪棄父序



臺灣戰紀卷之上

原編海  
借亡記

海東洪棄父祭

清光緒二十有一年三月

日本明治二十八年西曆  
四月十七日下關定約

遣李鴻章同五國西

使航東洋議和。割遼東半島、臺灣全島、界日本。償兵費二萬萬。先是我軍敗於朝鮮。退鴨綠江。喪九連城、鳳凰城。西及營口。南及旅順口。東南威海衛。京師震動。而臺未被兵。及廷命張蔭桓、邵友濂使東洋。日君辭不見。自是敵復有取臺灣為挾和計。計臺灣未能遽下。乃發兵船取澎湖。守澎湖總兵周振邦。怯懦無能。先是七日。有輪船二。詐法國舟。泊天妃澳。探港路。復登岸窺營制。周不敢詰。反宴飲之。越日而一舟去。至二月己巳。中二十七日西  
三月二十三日而兵輪大至。天

妃港我兵衆發礮中其二船。敵以兩船夾一船退。是夜廻航龍門港。以小艇登陸。周則聞風先遯。協防副將林福喜請兵不繼。亦退走。而敵帥伊東祐亨入澎湖廳。是時西嶼猶未失守。西嶼都司爲劉忠良。有膽勇。方日船之初至。即躡其船中人。而總兵禮之。無如何。及敵兵至。則直前奮擊。以無援戰死。于是澎湖各島無清兵。方澎湖急時。礮聲隆隆震臺灣。自辰及午熄。而巡撫唐景崧發電報。謂倭退走。迨越旦而嘉義樸子港。彰化鹿港。艤舟而來者皆我軍也。始知確耗。四月壬寅朔。和議定。洋商島民喧傳朝廷已割臺灣。巡撫猶未知。發電籲京師。而丁巳十六覆電至。百姓皇皇鼎沸。不願他屬。而巡撫及司道以下。發行李及眷屬先行。百姓愈譁。競起

要留官紳富室緘膝赴渡者。莠民遂出而截之。由是四處匪人全

起如毛。周宏遇者

或云周鎮邦

撫臺中軍統帶也。平時頗尅剝。有李文魁

或作文奎

以直隸游匪。從淮軍來臺。充撫轅親兵長。被副將武巡捕方

某革退。伏於臺北。聚黨掠唐婿余某內渡之裝。方某自撫署出。被

斫死。中軍護勇亦內應發槍。擊殺周宏遇。既欲入殺唐撫軍。而幫

辦大臣楊岐珍率兵至。撫軍反慰撫叛兵。命李文魁爲統帶。屯鷄

籠。官眷既不能行。則揚言朝廷無割臺意。第敵人欲之耳。百姓不

信。則復揚言外國出講。許割澎湖而已。迨戊午

十七日

而唐撫軍有

伯理爾天德事。稱臺灣大總統。建號民主國。立藍地黃虎旗。有誓

死不去意。百姓大懼。中南路又先發兵。鏟土匪劫掠者。百姓亦大

定。全臺各局。復爭擁總統固守地方。幫辦大臣劉永福守臺南。尤

民望所歸。自安平至旂後各港。重重布置。百姓咸恃以無恐。然福

建水師提督楊岐珍。則率軍先歸廈門。京師電至。謂臺抗京危。西乙

乘安南李鴻章電云越抗閩臺危而唐總統亦無守臺意。外借以苟安民心。內實冀有

外國保護。頻通信兩江總督張之洞。謀於法蘭西。而法方用兵爭

馬達加斯島。無暇他顧。以陳季同介法人求各國承認民國。不

報。聘俄公使王之春。過巴黎。屢說以利亦不行。總統乃失望。先是

大總統事定。即與紳民議送母回鄉。郡民悅而送至海。五月丙子

初六西六月二日而李鴻章子經芳爲交割事。偕日兵船至。至雞籠。知臺灣

有備。不敢登陸。指授臺灣而回。日兵船諗知鷄籠臺固。不易攻。

亦旋駛東北至澳底而登。守澳底統領曾喜照有兵六營。不戰而退。日兵進三貂嶺。三貂嶺有徐邦道一營。欲出戰。爲曾軍潰。衆衝動。亦失守。戊寅<sup>八初</sup>至金山。金山有臺勇一營。爲臺人簡溪水統領。聞寇壯甚。進戰獲勝。敵少止。越日再戰不能敵。唐總統命粵勇助戰。則將弁不協。反潰退。而大埧尖者天險也。循是而南。左獅毬嶺。右鷄籠山。獅嶺統領胡連勝。有兵六營。鷄籠總統張兆連。有兵十營。相隔不數里。連營墩兵。未嘗應敵。敵兵由金山分道進。至大埧尖。見無兵則大喜。既至獅毬嶺。驟雨濃霧。對面不見人。胡兵方備戰。遇雨則大懈。而敵軍著雨衣。戴油帽。冒雨乘霧。爬山而進。既近。我兵方知之。倉卒應敵。後路各民兵勢急。群隱身伺敵。而粵勇以

爲怯。反槍擊之。民兵怒譁。以粵勇叛。亦擊之。軍遂大亂而潰。於是敵兵長驅無所阻。張兆連胡連勝望風竄。當聞警時。大總統電召鄉紳林朝棟邱逢甲於臺中。林朝棟字蔭堂。父文察。小名有理。居踞罩霧山。以焚殺豪一方。同治元年。左宗棠以巡撫盪寇浙江。閩浙總督慶瑞檄總兵曾玉鳴募兵從征。文察應募。自溫州與衢州將廖士彥復處州。積功署福建提督。同治三年進漳州。陷通寇李世賢之難。焚死江東橋。朝棟則於光緒十年。甲應募。從欽差劉銘傳防法蘭西於鷄籠。十四年。割平阻撓。丈田彰化亂。民施九段等。以功保道職。是時亦防堵鷄籠。帶隊歸。有問者。慨然曰。我戰而朝廷不我賞。我避而日本不我仇。我何爲乎。得電不應。邱逢甲者。臺

灣粵籍進士也。未第時。受知巡道唐景崧。唐爲巡撫。思保舉之。奏章稱其領義勇百二十營。實不滿十營。及是亦不應。赴梧棲港舟先避潮州。唐總統於是四顧旁皇。其母自粵中募三千兵至。無所措置。而李文魁率潰勇自鷄籠入城。迫總統出戰。唐給慰之。轉身入內。從後門奔火車路。有問者。曰。將往鷄籠督戰也。既乃匿德國洋行。微行向滬尾。僱德兵船。護爹利士洋船西避。李文魁則劫府庫。焚撫署。飽颺至廈門伏誅。臺北既無主。散兵亂民。羣起攘掠。道路不通。民競閉匿。蓋五月癸未<sup>十三</sup>也。當是時。省城雖亂。日兵僅至鷄籠。未敢巡進。德商畢狄蘭以書告事實。有鹿港辜榮者。躡游在臺北。則手一織走鷄籠。操官話告日軍。以省城仇億狀。別將水

野遵以告大將樺山資紀。大將且喜且疑之。五月乙酉望。遣三百騎來刺之。至則城門不閉。商民屏息。散勇已盡向新竹。越二日而日大隊至。至則占民房。掠鷄牛。搜軍器。民之移家者。擔簞躡屨。扶老携幼。累重載舟。紛紛蔽海而浮。妓女勾婦亦有去者。風雲慘淡。日暮則道路無人。有聞扣戶聲。則闔室皇皇。相驚以番兵來矣。其駭異之情如此。五月既望。臺灣中路始知總統去。省城失。令人刺揅。至新竹。而民間方殺潰勇。謂粵勇通倭。道路梗不可行。而返臺中府孫。臺灣縣葉。彰化縣丁。紛紛攜貲重而行。則道路皆阻。林朝棟方在家。先在省城領後月餉。及是則發餉予勇。列隊而行。從熟徑間出。至海。府縣多隨之去。有委員黎維嵩。自臺北至。接署臺中。

具

府印綬。駐彰化。鎮撫臺中。有葫蘆墩。巡檢羅樹勳。接署彰化縣。有鹿港舉人施仁思。佐知府開籌防局。有苗栗縣生員吳湯興。領義勇到新竹守縣城。初湯興負意氣。遇邱逢甲統義勇營。慷慨自請。聞李鴻章割棄臺灣。則憤激作大言。逢甲亦鼓舞之。意氣益勃勃。逢甲故粵籍。湯興亦粵籍。聲類相翕。逢甲遂引見唐總統。總統方急時事。逢甲言無不應。卽給與湯興統領關防。湯興歸。則大會鄉人盟誓。益作大言勵鄉氓。鄉氓亦粵籍。咸不願屬倭。聽其言無不悅。則各搜器械。且饋糧。備應用。湯興乃作義勇衣。樹義旂。置親兵。列營號。出則擁護而行。其意氣壯甚。然其與敵衝鋒出陣。則皆徐驥。姜紹祖二人。湯興家銅鑼灣。在苗栗南。徐家頭份。姜家北埔。在

苗栗北、新竹南、二縣中。北埔尤榜山。二人亦粵籍。亦苗栗縣庠生。吳三十六歲。徐三十八歲。姜最少。二十二歲。徐姜成隊。卽行。結髮束袴。肩長槍。腰短槍。佩百子彈丸袋。游奕往來。以殺敵致果爲事。人不知其爲書生也。方湯興得關防時。則自苗栗街卽苗栗縣治率數百人北上赴總統。至新竹。聞臺北失。遂止。與傅德星軍截戮潰勇。防擊敵軍。適姜紹祖兵至。乃進駐大湖口。在新竹北二十五里。蓋紹祖先領義勇一營防滬尾。總統去。回至此。德星本林朝棟麾下。領二營在新竹。朝棟急行不及。撤爲知縣。王國瑞所留者也。是時日本自臺北分隊南進。一循山道大科崙。一循官道過桃仔園。至大湖口。道大科崙者。阻於山海鎖胡嘉猷。至大湖口者。阻於吳湯興。

一軍。胡嘉猷小名錦。本淡水縣吏。時自臺北歸。聞日兵至。閉竹林登礮臺發槍。日兵藐之。聚而環攻。嘉猷率數十人死拒。日兵攀竹跳而入。嘉猷率數人躍而殺之。如是者三。敵猶不退。嘉猷取舊扛礮出而無子。以鐵丸鐵釘糝入而發。敵始駭散。然猶不去。適大科陷簡愚等亦起事。大科陷卽大科炭也。時徐驥擊敵之隊。適至龍潭陂。勢銳甚。於是三角湧。三峽莊。一帶人民羣起相應。四面包裹。殺聲連天。日本大佐櫻井氏一隊六十名覆沒。餘敵不支。悉走山林間。三角湧人圍之。此東路軍也。五月辛卯廿一吳湯興軍自大湖口齊出赴戰。徐驥軍旣前進向東路。湯興紹祖則率軍自西而北。徧布官道。而西路日軍適至相遇。各開槍火。日軍恃衆。惟發排

槍彈如雨下。鮮命中。吳軍多山民。善狙擊。彈無虛發。日軍仆者相續。遂大敗。退止中壠。或退至桃仔園。越日整隊大至。復大戰。相持不下。吳軍非素鍊。又苦饑餓。不繼。新竹巨室復觀望。不供應。休憩各村。無所取資。已不可支。丁酉<sup>二十</sup>日。日軍銳出。殊死鬪。湯興軍遂敗。退紅山崎。於是日軍進駐大湖口。懾於前日之戰。不敢進。是時東路軍無聲息。日帥自臺北遣二十騎偵之。至三角湧。多要於路。亡十九騎。一騎歸。乃集衆往赴之。路窅窅難行。山民復齊出禦。不能進。有粵營勇弁舊駐其地。熟山徑。導之葦山。從山後入覆其家。三角湧民望見火起。大潰。而困守。日軍聞救至。亦軼出山。諸圍於山下者盡奔。胡嘉猷挈眷走新竹。於是東路通。其軍亦至大湖口。

湯

會軍。屢攻吳。湯興等軍。湯興乃回新竹。勒新竹富家納一年租稅。輸軍。不則軍法從事。新竹人大譁。敵氛日迫。湯興度不可居。乃與傅德星軍退出城。湯興退苗栗。德星退彰化。而新竹人或使無賴數輩。至大湖口輸情。於是閏五月辛丑朔。日軍整隊來。至則城上閔然。城門猶閉。王縣令出城南向大安港。乃踰城斬關入。以八百人駐守。而親王之兵繼至。初臺北既失。中路皇皇。謂不日敵軍且至。及是旬餘日寂無聞。迨湯興報至。始知有阻之者。湯興之戰。恆在後路。具文報。張戰功。列叙統領總把營官名目甚夥。蓋其時有前臺灣鎮總兵吳剛亮。在苗栗街北義民亭。眷口爲湯興所留。兵在義民亭山者。遂率湯興共襄戰事。剛亮已老。亦偕赴大湖口。而

徐驥姜紹祖每戰當先。則嘖嘖衆口。湯興既去新竹。剛亮爲脫身計。謬謂往臺南請劉帥援兵。率隊行。湯興即亦不之留。知府黎維嵩得湯興戰報。則大喜。及德星等軍歸。爰大怒。德星出示四月林朝棟飭其散軍隊。假棟字旗手書。知府原之。勗其再圖克復。知府乃邀集施仁思羅樹勳武進士許肇清。拮据籌餉。富室或西渡。或觀望不前。惟鹿港海關鹽務二宗稍可集。軍裝多取資舊勇。知府以其戚楊載雲爲統領。率一營。添募陳澄波一營。合傅德星爲四營。往招湯興集軍。德星等駐尖筆山。距新竹十一里。載雲軍駐香山。距新竹十里。湯興軍則駐於二地之中。半與載雲軍駐石厝崙。當是時。日軍得臺北一府城二縣治。西不盡海。東不入山。北不盡

宜蘭。南不出新竹城。而劉帥永福。撫有兩府八縣一州。臺中臺南。循海至山。咸願聽命。日軍恣睢。臺北鄉民。到處爲梗。迤西平頂山。民亦時截其饟道。而本國又方有俄羅斯。德意志。法蘭西。三國。逼迫脅退遼東。兵船不敢出。進退維谷。全臺之民。引領而望劉帥克臺北。卽不然。一偏師。新竹可立復也。乃知府攬權。恃有苗栗義勇。希冀其能集事。不甚請援臺南。迨後請援。則事去矣。我軍之再進也。初不敢坐甲糜餽。各尅期閏五月戊午<sup>十八日</sup>。攻新竹。而湯興先時乏饟。告於知府黎。黎撥本年串單俾收苗栗租賦。苗栗民皆願納。而苗栗知縣李焯不願。亦急徵是年賦。遂相齟齬。楊載雲新起。與德星諸人等夷。不能統攝。軍律不一。吳湯興與徐姜各居一方。

埔

事事先期約。陳澄波駐稍後。翼香山接待。先使告香山總理。總理則告新竹人。轉報日軍。於是師未行而期洩。日軍乃集衆先出四郊埋伏。城四門嚴盤詰。始誦新竹人以甘語。丁巳夜我軍三路進。傅德星自東門。陳澄波自西門。吳湯興自南。楊載雲繼後策應。徐驥。姜紹祖各從間道先進。而澄波軍至隙仔溪。猝遇伏發。避入樵園。發槍應之。相持至戊午。傍午麾軍退。載雲出牛浦會湯興軍。攻南門不入。合德星軍從東南路進。日軍先據城東二三里之十八尖山。則下山邀截。湯興軍熟山谷路。亟先應戰。載雲德星軍左右進。日軍憑山發槍。我軍先後奮迅爭上。奪其山。自山上發擡礮。彈丸及城中。日軍則發大礮。我軍伏避礮。十八尖復爲日軍據。我軍

或從山後束逕擊其腰。日軍復退下山。一上一下。如是者數次。新竹人從屋上觀。錯愕歎。兩軍壯烈。及礮丸燬城中。膽園王邸之廳。親王走。於是觀戰者亦走。僉謂來軍有大礮則克矣。我軍卒以無大礮。乏子彈。被驅下山。而西門勝敵之日軍復至。徐驤。姜紹祖之軍。爲日軍截斷。我軍乃引還。姜紹祖之進也。從山東道。越十八尖山。至新竹東門。將奪城。城上兵吹號發槍。城下軍驟至。紹祖所部二百人。衝爲兩段。一段奔潰。一部從姜紹祖。退入枕頭山竹林中。黃谷如空廈。日軍追逐前段軍。未遑躡紹祖。枕頭山者十八尖山下平坡也。距東門一里。紹祖望見十八尖山之戰。則從屋上發槍擊山半敵軍。敵始棄所追。集兵來圍之。紹祖欲出戰。而義民中有

怯者阻之。相拒至夕。槍彈盡。敵軍齊入。紹祖與七十餘人皆被禽。敵軍不知誰爲首。殺二十人。餘囚之。而紹祖自絕死。或謂贖出者訛也。徐驥率百人從北路將近城。登高四望。聞槍砲聲交加。見我軍在城東大戰。轉而南。擊日軍之背。日兵在城頭率隊亟追之。徐驥見其衆。分隊散行。避入箐以誘之。敵不敢入。發彈射。不能中。徐驥則誠無妄。發槍敵圍久。徐驥驟分兩隊出。一攻其前。一抄其後。日已暮。敵遂退。徐驥從山道全軍歸。蓋徐驥平日亦嘗引敵入箐而陷之云。是日之戰。軍數雖不明。我軍計有千數百。日軍雖鳩後方軍。計不過千餘。故日軍列油街中。積薪城旁。澆油民屋上。預備敗則放火取路竄。而我軍烏合。不耐戰。遇伏發遽退。或不退而苦

戰無援。故及於敗。是役也。敵不敢追。兩軍互有死傷。我軍損失無多。退仍屯守舊地。惟喪姜紹祖爲虧。軍爲短氣。日軍既退。攻城軍稍休息。輒復出軍。而西阻香山屯軍。東阻尖筆山屯軍。時有戰事。於是知府發電告急臺南。命苗栗縣李烱募軍。得黃萬機等四百人。添駐香山。而雲林縣羅汝澤亦出募軍。汝澤即樹勳子。尤撫轅巡捕。乘臺北之失。抱贖補官。而雲林路多土匪。不敢駐斗六縣治。隨其父住彰化城。雜務委記室羅君藍。久之。雲林應募者多。綠林亡命徒。視倭蔑如也。然府庫罄懸。月給彰化城練勇四百尙不足。雲林尤狹瘠。故俟至臺南來招撫始成軍。時已六月中旬。劉帥分軍至彰化。統福軍隊者吳鵬年。李惟義。領屯兵營者譚發祥。徐學

仁。吳書生盛氣誓死爲國。餘多浮流品。未至苗栗即不和。至苗栗。吳左袒湯興。李左袒李焜。即有交詈語。而日本新添二萬大兵來矣。來者爲高島副總督及乃木第二師團長。蓋已願退遼東。俯就俄德法三國約。而臺灣仍畀日本。可以壹意攻取矣。六月辛卯。十一日軍遂出新竹。分三道。鋒銳甚。天未明。電光爍路。礮火震山。左翼爲川村中將。右翼爲山根少將。中路爲能久親王。一衝傅德星營。一衝楊載雲營。一衝吳湯興營。是時我軍鋒鎔已鈍。漫無約束。使明哨墩。設暗伏。即敗。猶可成軍。而我軍不然。敵至。或戰或奔。於是楊載雲督戰中礮死。德星軍潰。湯興不在軍。亦潰。陳澄波一營聞風先竄。徐驥軍退至義民亭。糾湯興潰兵憑山再戰。敵從西襲。

其後乃引一隊退入山。臺南軍管帶袁錫清一作錦清林鴻貴戰死。吳李譚徐四營軍不足數。甫至後瀧。未敢進。見潰兵亦遂退。吳鵬年退扼大安溪一戰。餘俱退入大甲城。復扼大甲溪。再退牛罵街。牛罵街有富室蔡占鰲。領聯甲勇四百懼禍。勸勿屯其地。遂再退汴仔頭。旋回彰城。楊載雲屍自石厝崙昇過南隘歸。或曰載雲不退。部下殫之也。是日敵軍入苗栗。別軍循海至後瀧。不敢遽進。苗栗令李焯潛行大安港西渡。吳湯興與父及眷屬來彰化。而日本水軍至大安港鳴礮。大安南距大甲八里。大甲人遣無賴者充耆老。乘桴迎之。水軍不敢登。令向陸軍。陸軍將一爲伏見宮駐新竹。一爲北白川宮進駐苗栗。並日本親王也。北白川宮稱能久親王。亦

是時

先駐守新竹。既得鄉導。遂進大甲。時是知府再告急臺南。劉帥覆電。令堅守待援。六月戊戌晦。二十敵氛緊迫。城中人心皆動。各軍無敢出哨者。而徐驤領二十九人自苗栗陣上循山路至。慨然以二十九人行視城內外。夜宿城外。有問以眷屬者。浩然曰。有天道。臺灣不亡。吾脊可得也。臺灣亡。遑問家乎。警夜無憂色。越七月己亥朔。臺南軍至。人心始定。至者號黑旗隊。軍不多。越日復至。則臺南鎮標舊兵也。有旱雷兵二百。而軍裝礮彈從海道未至。壬寅四初而臺南軍再至。有七星隊一百。七星隊者劉帥親軍也。甲辰而海道三小舟載仗來。而黑旗隊已有出守大肚溪者。初我軍自苗栗歸。聞臺南出援兵。復進駐汴仔頭。去城北二十五里。七月辛丑日。

軍至牛罵街。我軍復退歸彰城。及是多與臺南軍駐城中。或隨黑旗軍拖大肚溪。去城北十里。是時日軍大至。屯大肚溪北。我軍惟黑旗隊數百並七星隊屯溪南。領七星隊將王德標、勇毅敢戰。有自溪下流由海濱載米欲濟日軍者。黑旗軍阻之不應。七星軍則下水牽之。突有敵軍二百餘列隊出。七星軍列隊擊之。敵勢銳而南。七星軍銳而北。兩岸彈子簌簌如雨下。敵迫欲下水。七星軍則迫欲登岸。後隊黑旗奪其米二筏。餘半委於溪。至日暮。兩軍收隊。七星軍不失一人。當時城中聞警。知府議分軍出援。李惟義等互相譏。迨敵去。遂止。日軍既阻黑旗軍。不能由正道。乃分軍涉溪上流。循大肚山。由葫蘆墩一帶過臺灣縣。轉向南望彰化進。臺灣縣

無我軍。而林族多承朝棟意。無敢生事。過五張犁庄。有庄民見其  
前隊。伏槍箐中。擊殺數人。後隊驚至。庄民走報彰化。發軍援之。至  
半路。以無耗還。而七月丁未<sup>九初</sup>。日將北白川宮知前隊已入。遂率  
全軍分三道繼之。其由正道者。黑旗將王德標躍出陣禦之。勢猛  
甚。黑旗七星隊從之。日軍多死傷。不能前。別軍轉由溪上下流涉。  
七星隊則望對岸戰而北。五人爲伍。以背相向。廻環發槍。散成數  
十隊。呼聲大進。黑旗軍左右應。而臺南鎮標軍屯軍來者。睨而視。  
有陰去者。王德標身被數創。望敵兵則堅立不退。麾軍截擊不少  
挫。而回顧八卦山火起。礮聲如雷。探哨報彰化失矣。左右強挾之  
行。有一隊一人殊傷。十一人護之。臥蔗園啖蔗。村人出視。勸埋軍

裝脫黑甲。可無禍。不顧而嘆。再晤之。則叱曰。我槍在。雖數百倭無如我何也。婦孺有走譁倭來者。十一人則束彈子袋。擎槍奮起。且出邀之。父老哀阻。而倭亦由他道去。於是招至家享之。越日。襄創引從別徑行。是日丁未天未明。彰化城聞大礮聲。各軍競起。紛紜不知所爲。城外軍走而入。城中軍走而出。武進士許肇清。武生許夢元。帶鹿港練勇出城。將登八卦山。八卦山駐有臺南統領李士炳。湯人貴。沈福山援軍。未及登。而彈子亂至。山上軍有打包奔來者。云統領中礮死矣。於是急奔鹿港。知府亦遂奔鹿港。吳湯興手一槍。束袴草履。麾義民出禦。而所帶三十人爲行人所擠。不得進。繞出城戰死。有傳其死於城間義民祠者。則吳鵬年也。吳鵬年自大

甲戰歸。亦守城外山。故或云死於八卦山。有李囉者。斗六田頭莊人。應雲林募。先一日帶五十人至。聞警出。見行人嚙走。喝行人列兩旁。望敵對仗開槍。而敵衆多。敵槍大至。五十人者傷八人。其叔亦傷。始退。而敵大入城。路逢人則殺之。散住民居。不設營帳。有大礮。有馬馱礮。馬蹄裹鐵。闐闐滿街。是日別分三路。一出城西門至鹿港。一出城南門至社頭。一路至員林街。越日至北斗街。知府黎維嵩由鹿港循海至臺南。路被掠。知縣羅樹勳父子。潛行鄉村三日。至鹿港。西渡閩。先是鹿港所來臺南軍仗三舟。由兩江所濟。巨彈地雷火線皆備。保甲局遣人起運未半。或入城。或未至城。闔城破。並委於路。日兵知之。卽下海。而潮方滿。天微雨。乃肇礮望海轟

之三運舟遂乘潮去。七月壬子十四敵前鋒一出北斗過雲林屬刺  
桐巷。一過雲林治斗六街。並至嘉義屬大埔林。日軍既陷雲林。於  
是分軍四出。而嘉義已先有王德標軍在。德標自彰化受傷至斗  
六。英氣不衰。誓吞敵。而臺南運餉銀六千至。然彰化陷。四處地痞  
土匪復起。雲林尤甚。有欲掠入縣署者。德標乃同雲林縣記室。以  
銀寄陳筋、簡大肚。應募名成功張大猷三人。人各二千。大軍至聽用。三人  
者所部練勇多土匪也。德標入嘉義養創。發電臺南。臺南軍再至。  
統領楊泗洪。或云姓張朱乃昌並勇敢。而二軍不盈五百人。七月癸丑  
望。至嘉義北打貓莊。問前敵人數。行人曰四百餘耳。實八百多人。  
二將奮而前。夜至大埔林。大埔林在嘉義城北三十里。臺南孔道。

繁盛地也。敵兵散處民家。二人伏軍兩旁。引百人呼而入。縱火四處。敵大驚。踉蹌奔出。出則被我軍截擊。敵大亂。走至橋。橋爲村戶。薛玉折。半溺死。而楊朱二軍乘後追擊。殺又大半。有日將殿後。泗洪跳而前。欲生禽之。中槍亡。朱亦中槍臥道旁。朱髮禿。鄉民誤爲倭戕之。不及遠追。而半途有中埠莊土豪費榮邦。小名阿丑。應募名黃榮邦先受劉帥札募勇。及是引衆追擊。敵愈狂奔。追至他里霧。敵入神廟。閉廟門。衆圍之。阿丑自手大斧劈門。七人隨之。敵槍亂發。阿丑跳而入。敵越牆避。有走散者。死於路。殘卒五十人。逃回北斗。夜裝軍械盡矢。身淋漓。徧泥塗。於是王德標率軍進。收復雲林縣。各處日軍多退。雲林地無敵踪。敵軍大震。大隊不敢行。嚴防各路。當是

時苗栗、彰化、臺中雖失，而劉帥尙擁有四縣一州。臺東得臺灣之

半。而民間訛言謂劉帥率軍出某日當至某處。某日當尅某地。日

軍無紀律。所在擾民。悍民亦時劫之。日大將徘徊歷匝月。再請本

國添援軍。自臺北而集中路。始克成行。八月壬午。十四日日軍水陸

望臺南並進。水軍分二路。一向臺南府。一向鳳山縣。陸分三路。一

自永靖街。即關帝廟過芭蕉脚莊。向斗六。爲東路。一自北斗街過西螺

街。向土庫。爲西路。一自北斗街過刺桐巷莊。向他里霧。爲中路。所

略皆雲林縣地也。西路有民團廖三聘。扼西螺溪一戰。東路有義

勇團簡成功。出斗六街一戰。皆不久而退。惟中路義勇團黃阿丑。

與臺南軍黃統領守他里霧。頗有軍勢。先一日。敵騎出哨。阿丑料

遂

明且必戰。約黃統領同出設伏。統領怯不聽。阿丑曾向土庫招死士三百。未至。則自率二百餘人伏北部庄。天甫明。敵軍至。阿丑軍出要之。槍礮交加。敵遇回軍圍之。阿丑堅陣不動。而敵前軍已入他里霧。黃統領之軍被衝潰。敵大縱火。二百人或去。或挾阿丑俱去。阿丑則脫軍衣。潛入他里霧。獨伏街亭觀敵。迨火及街亭。乃跳而免。而土庫三百人者。行遇西路日軍。發槍擊之。敵大至。退入神廟中。或守於門。或伏牆頭。或隱鴟尾。擊敵輒中。至晚成隊。嘯呼出。敵不追。敵之過他里霧者。遇王德標前軍。各收隊。初德標自彰化受傷。至嘉義養創。所部黑旗軍。參加雲林軍。戰勝後。多回臺南。及是聞前敵急。領新軍出。而簡成功子簡精華。本名嬰亦作美自斗六至。林義

成、黃榮邦亦率義勇來。越日再戰。日軍三路齊攻。戰士十倍。大礮機關槍並發。馬步齊驅。銳不可當。黃榮邦等多受傷。都司前三發等戰死。火及大埔林。大埔林爲前月覆敵地。敵尤恨之。火大起。德標軍不支。於是雲林再陷。兵及嘉義。是役也。日軍山根少將亦罹重傷。旋歿。兵士死傷者昇回彰化。德標軍既退。預料敵將躡至。沿途各隘路埋下地雷火礮。既越日。令瀛卒散出。向打貓道誘之。八月丁亥。十九日天未明。日軍齊發。敗卒呼譟退。敵大隊逐之。既誘入地雷道。各處火線並發。敵出不意。轟及千人。死數百人。能久親王受重傷。義軍林義成。民團林崑岡。前後襲之。於是日軍大敗退。戊子<sup>十二</sup>復進。大礮益猛攻。德標軍不能敵。退於城南。嘉義陷。城內外

被兵燹者皆成墟。德標軍退。議所守。而徐驥從總兵植正材率臺南軍至。乃共扼守曾文溪。初徐驥自彰化失後。所部僅存二十人。至斗六參民團一戰。即走臺南。劉帥亟獎之。命入蕃薯寮打鹿埔一帶募軍。餽械缺乏。止收三百人。及是復與德標軍出營敵。然後退。徐驥好衝鋒。或勸之。則歎曰。此地不守。臺灣亡矣。吾不願生還中原也。是時日軍勢成破竹。曾文溪北距嘉義城六十餘里。南距臺南城四十里。臺里一里抵中華里半臺南已成孤注矣。方臺北失守時。臺灣鎮總兵萬國本。臺灣兵備道陳文騷。早於五月間自臺南西遊。劉帥在鳳山縣打狗港。視察旗後礮臺。聞之。委鳳山一帶軍事於義子劉成良。星夜赴府城。入鎮撫。委人署司道府縣官。苦乏餽。邀集

紳商行官粟。勸軍需。遣人北洋。乞助於北洋大臣劉坤一。南告兩江總督張之洞。西南告廣東總督。皆不即復。惟張之洞於五月閒遣司道易順鼎訪劉帥。彼此誓復臺北。而無他耗。張督即電召回。久之。兩江略有饑械至。己不濟。劉帥兵多新募。鮮舊部。無復曩日掃盪法國風矣。八月己丑。二十日本水軍護混成第四旅團。由布袋嘴登陸。日本陸軍至鹽水港應之。先是日帥樺山介英領事。願爲劉帥開發軍餉數十萬。指英商行支取。以戰艦商船載劉軍歸清。劉帥不應。至是劉帥復英領事。欲履前約。日帥不聽。而廣東派大員陳泰亨來。勸劉帥回國。於是劉帥無戰志矣。八月辛卯。廿三日軍前隊略地而南。阻於曾文溪軍。戰不利。水軍一隊自枋寮上陸。

枋寮在鳳山以南七十五里。散地也。然上略東港。下略恆春。亦可以震我軍。癸巳。日廿五日軍遂水陸大舉南進。水軍一隊由鷄籠出發。攻安平。一隊由澎湖出發。攻打狗。陸軍則三路齊發。中路略茅港尾。西路略麻豆。東路略角秀莊。我軍扼曾文者。先戰溪北。後戰溪南。徐驤當先。柏正材、王德標、麾軍繼之。日軍礮火大發。馬步齊攻。我軍不獨無艦隊。無礮隊。並無馬隊。於是徐驤步戰最銳。首中礮死。總兵柏正材陣亡。管帶官及民軍林義成、林崑岡等亦多陣亡。王德標簡精華。不知所終。潰軍入臺南。一路遂無守禦。方日本水軍之出也。一阻於安平礮臺。一阻於旗後礮臺。是時臺南鳳山聞戰艦來攻。陸軍又敗。民心惶惶。爭覓舟西渡。八月甲午。廿六水軍

戰艦七艘。再攻旗後。礮彈燬山半廟門。或墮營中。旗後附近村落。或入山。或浮海避礮。旗後街爲之空。守礮臺劉成良。走入臺南。礮手欲走者。爲開一礮。水軍見礮臺無聲。以小艇載兵上陸。越日一隊向鳳山。一隊入舊城。舊城在鳳山縣治東北十三里。在旗後打狗北六里。本嘉慶以前鄭氏舊縣治也。負山瀕海。雉堞樓櫓猶完。城中鮮居民。多居城外。八月丙申。二十騎兵自南而北。向臺南。過阿公店大湖街。至二層崎。而鄭清一軍扼二層溪。擊敗之。鄭清者。本鳳山綠林豪。其儕七百。應劉帥募來謁。不願受餽。願殺敵。領一軍守鳳山路。至是遇敵騎。齊踴躍。伏而擊之。殺十數人。取其馘獻府城。諭劉帥去。擲於路。告鄭清退入山。方是時。日軍南北夾攻。雖

有勝敗。而郡城已在握中。九月己亥朔。劉帥集衆議。或言退倚城東山。或言出城決戰。劉帥知難守。越日率成良等潛至安平港。下英國爹利士舟。日艦望見。即追之。天微明。追及廈門港口。揚旗止行。日將持劉帥照相至。船長反局所坐艙。同出搜檢。船中官紳民眷盈載。見高大者。衣冠者。輒繫之。至日午。搜不止。水兵紛至沓來。老弱婦女爭赴海。水手救之。溺一人。船上高颺救急旗。英領事自廈門乘快輪至。大言曰。兩國和約。不云臺灣有遺軍。貴國當載歸清國乎。今欲得劉帥將禮之乎。抑辱之也。日將屈。顧而嘻曰。劉永福奚往乎。乃皆釋之。而劉帥實臥船長坐艙也。九月壬寅<sup>初四</sup>。日軍大入臺南府城。能久親王創發莖。臺灣陷。

臺灣戰紀卷之下

海東洪棄父纂

歲乙未九月。劉永福既去。殘兵或去或潰。或竄入山。日軍徇沿海沿山各地。越十日。自鳳山分軍南下恆春城。自中部分軍進屯內山埔裏社。自臺北分軍取後山宜蘭縣。陸軍由三貂下北關。水軍由蘇澳徇南關。臺疆略定。祭悼陣亡將士。高島副司令率一隊凱還東京。總督巡臺南。返臺北。布告民政。是時惟後山花蓮港未進軍。而臺東尙有清官及兵。可不勞而定。故總督府以下官。預備新歷一月元旦。行大慶賀。是日爲舊歷十一月甲寅。日十七而十一月癸丑。日十六既望夜。忽有民衆會政府城事。來者二大股。一股新竹



胡嘉猷率。自三角湧突出。一股臺北陳秋菊率。自大龍磅突出。圍攻城下。殺聲槍火連天。夜中三千餘人如萬人。計劃一覆省城軍。可以四出破他處屯軍。除各地辨務署。四方自多響應。而總督樺山。自泚臺來。尤未臨陳。及是從夢中驚起。親督軍守陴。憑城發礮。城下民軍阻於城。屢衝不入。城上軍隊密梯不能及。圍攻既久。天大明。城外大稻埕。艋舺。二大市也。無敢開門。亦不焚掠。即各散去。路中惟毀八芝蘭學校。殺守路軍人。而日軍見其退。則亟啓關追。並焚附近村堡。殺早行人。窮治徒黨。而匪徒多散入山。治者輒非匪徒。於是全臺戒嚴。拘繫各地辦局諸公。元旦不賀。遣兵搜索山外居民。開道路。設郵局。而丁巳後山警報至。乃復有宜蘭之變。初

日本之取臺。惟宜蘭最恭順。宜蘭者。噶瑪蘭也。光緒己丑。改廳爲縣。城中有土著老舉人候選縣李望洋。約各鋪戶。日日候迎日軍。臺灣之迎日軍者。無甲乙科人。亦無士籍。甲科若施士洁。若許南英。均襄助劉永福饗事。時事去則已亦去。鹿港蔡德芳。雖不與事。亦望風去。惟李望洋。利無廉隅。不去亦不隱。當全臺未有剪髮時。首先剪髮變服。躬迎日軍。宜蘭人目笑之。則曰。吾以老頭皮易蘭城生命也。然望洋之媚敵。時時遭侮辱。益爲蘭人所輕。兵士亦復凌虐居民。輒出擄殺。於是抗者四起。自礁溪旱溪迄員山。暴徒爭攻屯軍。自蘭城北至頭圍。南至羅東。處處騷然。日軍走淡水。十二月丁卯朔。調軍艦二艘。派遣混成第七旅團。向蘇澳上陸。蘇澳北

去蘭城五十里。距頭圍八十五里。越四日辛未。五初軍至礁溪。又二日癸酉。軍至頭圍。守備軍復至。民衆不能支。弱者潰。強者悉入鼎底孟。鼎底孟四面山。四壁峻。外隆而中窪。壑谷走番山。日軍入。輒挫。乃屯山外以困之。越丙申年二月朔越二日。總督府命使者至臺東州。咨清知州去就。越七日而恆春守備隊及水師亦至臺東。臺東者鳳山後山之東。清乾隆時七十二社番地。歲納饌六十九兩。時閉時通。視同棄壤。志所謂卑南覓也。州治地實迤南。光緒初元。日木尙未統一。薩藩西鄉從道欲擄兵。則以舟師攻牡丹社。報仇殺。是地屬瑯嶠。在臺灣南端界外。清遣欽差福建船政大臣沈葆楨。率軍來。日軍退。始駐兵。自瑯嶠鑿山刊木。通翠南。瑯嶠即今

恆春也。光緒十五年己丑。極南置恆春縣。極東置臺東州。及是。清知州張儀春。交出土地冊籍。勇丁名簿。退歸國。而水軍復北上。收花蓮港。花蓮港在臺東適中。與埔裏社對。於是全臺始悉入版圖。侯爵伊藤博文來視臺。地方報肅清。第二師團歸還。頒布民政官制。而腹地繁盛之區。伏莽又蠶起矣。初日軍之至。各地平民懼甚。路絕行人。炊火無煙。市街闕寂。民間相驚。以倭鷄犬無聲。及肆爲淫暴殺戮。民轉藐之。相指詬不以人類目。軍政施則憲兵可殺人。民政施則警察可殺人。憲兵長之良者。亦能約束軍隊。憲兵不使肆暴。而良者鮮覩。日本惟民政長官水野遵。老成有漢學。有懷柔臺灣心。日人之欺侮臺人者。懲奪臺灣權利者。斥本其政略。可以

旅

安輯內外。永遠無事。而武人當權。視爲無能。新進操切。以爲老朽。不旋踵而去任。其他將官。則皆庇日而屈臺。吏復腴脂剗肉。民無所控愬。弱者吞聲。強者走險。舊與日爲仇者。或爲之備。於是南路有鳳山嶺。大岡山之變。中路有大坪頂。刺桐巷。埔裏社之變。而大坪負嶠最久。施拒踰四年。其始事則丙申三月也。山陡峭。連大山。在雲林治斗六街東南。最曰大坪。距街二十餘里。次曰小坪。十餘里。山有村落。亂時民多避入。故人煙轉盛。維時有山外民被兵虐。婦女被侮者。徙山中出貿易。遇兵奪其貨。乃寅夜結隊。劫兵舍。劫日商。并劫憲兵署。既諗日兵怯。不敢追。則習爲故常。晝劫街外。夜劫街中。日軍不堪。則鳩四處守備兵於斗六屯。購民間知寇巢者。

民漫應之。指大坪頂以告。而又告大坪人。於是兵隊深入。導者迂其途。無所遇。日暮至山崦而還。則焚旁山村落。於是山下人悉與山上合。而夜劫敵者益數。亦稍取富室以爲資。丙申四月。日軍聚衆復攻大坪頂。大坪民已徙入山內六里。曰部庭尾。山尤四面峭中。一道如線紋。旁則古樹喬松。參差蔽天。石纍纍。或圓或墮錯。怪鳥愕於林閒。獸駭羣起人面。兵隊不能成行。輒尋有竹屋者焚之。屋則無人。前去窾巖。不敢再上。循大坪左右麓而燬。有柯鐵者。業製紙者也。年二十二。爲製紙家。削竹浸池。勤力作。不隨衆爲非。身手健。喜獵獸。亦精槍法。時始娶婦。爲儕輩調笑。與山人十數輩。避兵山間。兵至爭走。柯鐵曰。是可取也。君走。則槍與我乎。衆付之。有

槍十二桿。彈子十袋。於是放火樹下。蹂入深叢間。登高望兵最多處。連發槍擊之。兵出不意。盡驚駭。疑中伏。槍亂鳴。且擊且走。柯鐵則復轉他路截之。兵見無人。復止搜山。而槍復至。至如雨。蓋柯鐵挾十三響槍一。七響者三。餘亦四五響。每一發連至如三四十槍也。兵有傷者。有仆者。昇而行。山深日暮。不敢留。柯鐵一路截之。敵疑伏多。遂大奔。先是日法嚴。搜軍器。民多埋之。及是取出。洗刷不工。柯鐵連放。已斃其八。惟十三響及七響者。四桿不燬。柯鐵挾以追之。柯鐵徑道熟。年少趨捷。行林木間如飛。倏東倏西。其來閃屍。槍無定處。故能以一人獨驅敵五百餘人。軍裝糧秣。悉委於路。懸尸荆棘間。有至竊者。由是柯鐵膽益壯。儕輩匪徒。羣以此服之。遂

有十數輩與聚。號之曰鐵虎。日軍至斗六。夜已黑。警守至天明。亦  
聚衆謀報復。聚既多。越二日再行。再至大坪。柯鐵至是則不復避。  
招所與處者。益以旁近山民數十。出伏林間。兵既過而伏發。截成  
兩處。在內者突欲出。在外者猛欲入。柯鐵等列槍齊起。上等兵下  
等兵。殪五十餘人。守備隊長亡二人。狼狽奔返。大坪頂人有歸巢  
者。遂作厥寨計。而部庭尾村長張考。家饒裕。商業數處。不欲仇倭。  
乃遣人至大坪。勸柯鐵徙入山內。願資鐵築室。毋生事。柯鐵悅。而  
衆人者素聽張總理言。則亦散。張考乃令人至斗六。託保良局關  
說民政局。以張考兄張是作引導。窮治起事者罪。守備隊隨之行。  
既入山。則聞無人。張是引至數村焚之。村各遺有鷄豕米粟。餽使

掠之。復窮搜數山。還報土匪遠颺。俟緝獲。冀可了事。民政局。日官也。許之。令約束近庄民。毋助匪類。而守備軍以隊長亡。兵多暴骨。不可已。顧畏大坪頂路險。雖引導不敢入。於是出哨。見有從山出者。即謂匪人。輒捕之。殺無辜十數輩。而張是子到斗六貿易。亦被逮。張是聞之。恃有前日鄉導功。則至軍保之。亦被收。民政局長聞之。親至守備隊勸釋之。而武人藐文吏甚。立殺之。張考既喪一侄一兒。則憤不爲保家計。招匪徒黃選等助。柯鐵任爲之。張考家素豪。山中往來者多就宿。聞其欲舉事。則羣至。張考乃收買軍械。舂硝藥。磨刀礮槍。出饗食。其族屬張大猷。張呂赤。張呂良。咸攘臂起。於是白晝列隊至斗六。攻守備兵屯所。柯鐵佩刀挾槍。袒而行。衆

酣呼即隨之。分數道守備兵。一日數驚。五月辛丑<sup>初七</sup>。飛遞集臺中。嘉義彰化各處防軍。至雲林謀剿之。而大坪頂已先有守禦。插木爲杙。編竹爲藩。誅茅爲寮。自小坪至大坪。一路數寮。寮爲營。營大者數十人。小十餘人。復出前官軍所棄巨礮。置險要。自山上直山下。俱設伏。明警墩有敵至。鳴槍爲號。則他處應之。所聚皆亡命徒。有無父者。無兄者。無子侄者。皆兵所殺也。有無家宅耕業者。無牲畜者。無菽粟者。皆兵所焚所掠者也。衆至山。無有厭恨。以報仇爲快。恨倭不大至。於是五月壬寅<sup>初八</sup>。日兵集斗六者。天未明。吹喇叭造飯。秣馬蒔食。人帶飯丸。攜水飲。負槍橫刀。牽馬箠礮。紅帽兵。黃帽兵。皂帽兵。各以色分隊行。挑夫成羣。以吳明爲鄉導。望大坪頂。

進發。未至山。天明。進至山麓。搜伏。然後行。近小坪。巨礮望山壑深。斃處轟之。礮震山谷。林木簌簌下。見無人。再行。或攀藤。或爬石。既入小坪。諸山民度兵入伏。四山鳴礮齊起。或前或後。或出中間。殺聲殷山。槍大至。皆出林木間。或隔溪壑呼譟以驚之。兵大隊不能行。少輒爲所算。草木陰翳處。數槍起。則疑爲大衆。山頭見人形。往則不可及。而呼聲槍聲。愈出愈近。有截擊者。軍遂亂。於是中槍者。躑者。踣者。顛者。俯前墜者。仰後絀者。奔散者。有被牽入林木中。慘殺哀鳴者。計軍位凡九等。自將以下。曰大佐。中佐。少佐。曰大中。少尉。爲差。是役集各處軍。自大佐。大尉以下。死者數人。兵丁雜目。死三百餘。具見文報。負傷遯歸者。嘉義守備軍長。中佐益田氏。少佐

左篠氏。中隊長大尉古市氏。暨雲林支廳憲兵警察人員。或潰或傷。不可勝數。中尉中村益明。爲山人生獲。凌遲死。懸屍山麓。越數日跡得之。軍中大號恟恨。於是電至臺北總督府。始報土匪猖獗。請益兵。蓋前此兵隊。一度登山焚燬。則報一次土匪掃攘。實不見敵。而駢殺山下人爲功。及是始不可掩。然是時臺北臺南。各有暴徒紛起。臺北旁山諸處。徒黨衆多。起非一地。擾非一時。倡首非一二。而以簡大獅陳秋菊爲主名。臺南之亂。則鳳山縣北爲大岡山。鳳山縣南爲鳳山嶺。二山不及大坪山之遠。大岡山屹起平地。西至海。南至小岡山。東去後山尙遠。介安平鳳山二縣中。鄭青之部。自應募。一當日軍。劉軍去。遂竄伏四處。及是合新附之衆。出沒

於大岡山。攻至阿公店。阿公店之街。當臺鳳孔道。有駐兵。有支廳。一蹂躪而南路梗塞。故鳳山嶺之徒。益不可制。鳳山嶺在鳳山治南三十里。倡首爲林小貓。山中聚黨數百。出新草嶺。攻鳳山城。更遠攻阿猴街。縱橫剽悍。出輒有二三千人。二處守備兵無如何。其地遠。戰跡不詳。然鳳山官署。至遣人議和。劃地分界。約曰。界以內軍警不許入。界以外武裝不許出。其勢力偉大可知。當是時。臺北簡大獅。臺南林小貓。中路柯鐵虎。不約而同。各建旗鼓。謂之三猛。大坪頂屢攻不破。衆以鐵故。咸目之曰鐵國山。五月己酉。望遂立鐵國旗。旗鼓游奕下山。駸駸乎勢力伸於平地。於是復有庵古坑。林杞埔事。庵古坑距大坪頂八里。在山麓。如小坪然。日軍既敗於

大坪無援軍。不敢深入。則循大坪山麓而燬。至庵古坑。村人素守法。懼甚。村中總理庄民宰鷄豕。列酒食出迎。兵至不問。齊縛之。使列兩旁。一兵對一人。喊聲槍殺之。村民或駭走。則追屠之。於屋至梅子坑等村亦然。然有先走者。於是遠近鳴鑼集衆。競起截擊。各隊兵豕突而歸。遠近村乃盡切齒。皆附大坪頂。扶老攜幼。墮入其中。壯者則矢出報復。而林杞埔距大坪頂斗六。各二十里。亦苦其地憲兵暴。不能堪。有強徒在陳水家。衆談及。曰何不殺之。陳水曰。無其人。有陳細條者。素瘞亡命。習與匪類依。曰我能致之。一夕而聚。歷數之。八十七人。曰可作矣。陳水本雲林縣胥。計長取巧者。曰姑徐徐。而細條之徒。出入市中。藏利七短槍。衆譁土匪至。土

匪者。倭指目大坪頂之名也。憲兵殊畏之。越二日愈譁。陳細條度不可已。日中春。羣起攻之。憲兵將出。而槍至。急閉屯所門。屯所本占陳姓祠堂。門戶堅不入。衆灌石油火之。夜逸於斗六。而其時復有集集街殺兵事。集集在高山中。爲入內山埔裏社孔道。距斗六大坪頂七八十里。亦先爲兵殘而後殘兵。人衆者勝。兵隊不支。竄走南投。各地騷然矣。陳細條既攻破憲兵。林杞埔人懼禍。齊見陳水曰。君等孟浪。今奈何。陳水乃招諸長老往大坪。朋見陳舫。陳舫者。細條叔父也。居刺桐巷。爲一方豪。亦避兵徙此。細條不敢見。陳水述之。舫乃召細條來。細條兄大條亦來。舫曰。少年乃作事累人乎。既作之。當受之。可尋臙鼻發。臙鼻發亦舫侄。清國時行劫。爲舫

所欲殺。迨日本亦命擊。逃入東勢坑。距大坪不遠。至是始出。陳發  
出。則集所與遊樞埋徒出山。十人一小隊。五十人大隊。六大隊  
至斗六。急攻以阻日軍。負挺隨後者漫山野。而斗六已添有來軍。  
先是斗六數被柯鐵、黃選、張呂赤等劫營。至是所屯皆築牆。日兵  
行無營制。無壁壘。其有牆堡。大懼也。五月壬子。十八天未明。而陳  
發率衆來。勢猛甚。衝入雲林斗六街。一攻守備兵。一攻憲兵隊。科  
頭跳足。匍匐望槍礮中伏而進。聞槍聲。則偃仰而倒。以足擊槍發  
之。日軍嚴守陬。發排槍。山民則盤身於地。轉而進。或跪挾槍而前。  
近牆不可登。則或攻。或穴牆。或跳而鬥。或轉從民家破壁入而放  
火。陳發率諸從兄弟六七十人。無不一當百。奮居前。日軍不輕退。然

未嘗遇此惡戰。至是見牆下橫尸。屯內火起。則已悸。及日午。而張考發人從柯鐵至。人益衆。聲震城衢。遂大潰。且戰且望南投走。或走刺桐巷。文吏或匿民家。走刺桐巷者。陳發率衆進攻之。走南投。則陳釵陳越兄弟圍之。釵越居邇南投。三月中避憲兵殺戮他徙。至是率衆入街。逢兵則殺。遂攻屯所。憲兵與守備兵駐兩處。及是與各敗兵合屯吳廷儀巨厦。廷儀家富媚倭。於是謹助之守。男女盡躬汲水。饌人入內運木石。陳釵率衆擲火。掘牆越壁無不至。俱爲內阻。乃從外圍困之。而刺桐巷有陳發舊黨。陳發至。多助之攻。日兵遂不守。羣走北斗街。告急各處。臺中縣中將兒玉源太郎。鳩縣內兵。及彰化鹿港各防兵赴之。而南投軍索救急。復分軍援南

投阻於牛牯嶺人不能過。而集集敗軍。遯至臺中。兒玉氏復遣之。救南投。從他路至北投。見草鞋墩市集。亂殺亂掠。農商死者四五十。草鞋墩憲兵部沮之。不聽。及至南投。民衆先出街攻之。竄一大屋。民衆圍之。陳釵陳越等。無陳發柯鐵勇敢。故祇能困敵。不能破敵。五月丙辰。二十臺中縣復遣兵出。而北投民憤於乙卯日之戮。無不寒心。先已通約各村嚴備。而兵過者殺一幼童。於是憑烏溪一帶村莊。齊起追之。日兵奔散死。或復逃返大墩。大墩者臺中縣治也。而草鞋墩商戶李烏毛。先被兵屠。妻朱氏大慟。及是。則散財募衆。攻大墩。得倭馘者獎二百金。是日三馘。立予四百二十金。丁巳黎明。衆至大墩。攻臺中縣治。朱氏親至大墩。給糧食水飲。臺中

兵不多。而四方似擾。懼甚。民衆一呼。即入城中。守備警察憲兵各隊。悉退守試院。試院者。前清督學試士所。規模廣闊。今中將居也。日兵悉登牆發槍。民衆自外圍。不得入。日薄暮。方謀擲火。而兩大至。民衆烏合。無兩具。遂有散歸者。日軍見民衆漸稀。則出院逐之。遂燒殺近城村落。村落實不敢與衆食宿。衆散而亦及於難。方北投人之攻縣治也。道過林朝棟本居地阿罩霧。費郎林文欽林朝選欲尼之。見勢壯不可遏。而林族一方。及他姓。苦倭暴。亦勃勃欲起。朝棟臨去。戒弟朝選無生事。故林族始終不助清兵。饒。及日兵屯罩霧。則首擾林家。婦女亦不許避。朝選迫於衆。知難沮。則搜出所藏軍器予衆。勸俟明日。而是晚攻大墩者散歸。乃匿軍器。欲遮

其

留過者以自免。衆意不同而止。而南投日兵脫出。先是南投軍得集集竄軍來合。即出衝至街。而大尉山田萬次郎被槍死。憲兵守備兵死無數。復退入。越二日。北斗援軍至。內外戰。始拔出之。於是盡燒南投街市周廬。遞回大墩。大墩方受圍。見軍至。則再遣四出。燒庄示威。而戊午五月二十四北斗街失矣。初陳發既攻得雲林縣。入斗六街。秋臺無犯。令於衆曰。我等苦倭者殺掠耳。而效之。是一倭去。一倭來也。甚戒之。攻刺桐巷。敵望風遞。於是進北斗。北斗當南路之衝。守備隊憲兵隊防禦密。守備隊長宮永計太。約軍有法。而天未明。陳發率隊至。日兵猶未炊。初至百餘人。直衝守備軍。守備軍已築牆。或登壘。或出憑濠。發槍如雨。陳發居先。衆隨之。俯伏膝行。

直逼壘。揮刀鳴槍。肉薄戰。守濠兵。敵不住。則退入牆。陳發等既奪濠。則伏濠底。擊牆頭。無不殲。陳發兄弟後隊至。見南門攻不入。則率後至者。轉從東門入。擲火而進。日軍前後受敵。戰久飢疲。亦放火。開民家籬笆奪路。日軍割竹籬欲走。民軍亦割竹籬入。相逢復大擊。敵列槍擊而退。陳發等列槍擊而進。於是擊殺大尉宮永計太。追至北斗溝。復擊殺憲兵中尉田島憲藏。餘兵亦多死。於是殘部大奔。陳發追憲兵。見小野氏。曾爲所拏。則欲生禽之。獨身跳而進。急斷橋。遂中槍。日旣晏。諸壯士入北斗街。先撲滅火。然後呼開民戶。勸安業。取水飲而已。衆旣集。四百人。不見陳發。有扶其尸來者。衆大慟曰。事去矣。我等尙何爲乎。其兄弟則哭曰。若俟破彰化。

至臺北。死無恨也。今已矣。於是成隊護喪歸。自大坪起事。惟陳發出七日。連攻三要地。如破竹。蓋不獨勇敢。亦善審勢。得衆心。既死。全軍解體。歸大坪。繼之者烏合。無驍桀矣。宮永計太。好將也。讀書知大義。不擾民。從容敢戰。北斗人稱之。既亡。餘衆走彰化城。臺中大震。發電臺北。再索援。於是罄新竹苗栗兵來。當是時。臺中四竟。土匪如蝟。嘉義亦震動。簡嬰等攻入大埔林。道路盡梗。彰化以南。電線絕。消息不通。沿海旁山強徒。橫軼繚遠。日本自乙未七月大埔林之敗。棄地二百餘里。至是復然。是時各地守備兵。憲兵。警察。辦事官。盡遯彰化城中。及臺中。惟鹿港以近城未遯。而戊午聞北斗破。人人色如土。鹿港街南故有小土城。爲前清游擊兵營。時日

本官吏兵丁。各色商人娼妓。盡遷入之。不敢處街市。官署屯所一空。輦載如飛。婦孺啜泣行。土城有頽。運土培之。外編籬。置糞築。激水滿濠。內積糧儲石油。一晝夜數驚。兵有悸而自戕者。鹿港街長爲顧民勇千人以安之。越夕復疑不敢任。散之。每早出哨三里而返。紛紜三晝夜。不見警。始稍定。而壬戌二十八日揚旗擊鼓之衆至。先是陳發行劫。踪跡遍全臺。南北黨羽多。旣勝敵。壯甚。按程直搗臺北。旣死。部衆心灰散去。而北斗人陳鱸翻。別聚一黨。繼之。然貪怯無能。無戰鬪志。惟事科斂街中財。約社頭人蕭石星等攻彰化。衆次員林街。疑所往。而鹿港巨姓許肇波。先爲憲兵慘殺。族人不平。一流蕩獅子。與地痞施搖。導之攻鹿港。鱸翻石星旣不敢向彰化。

城

復不入鹿港。止於三里外同安寮。其衆分三路。至港不見隊長。則皇遽散處各寺廟。獨港人施鸞操長刀。越土城濠。斫竹籬。中槍死。遂無繼者。土城中則擲出火箭。射火箭。環燒近街。三面市街。居人空屋走。日人遂出放火。風烈火熾。焚燬五百餘家。而來衆方午飯於龍山寺。或徙倚街中。不傷人。人多出觀。日軍窺其弱。分兩路出擊。寺中衆混亂。或戰或走。在街中者。日軍攻其前。或上屋攻其後。亦走。同安寮隊已先走。日軍懾虛聲不敢追。殺街人二百餘。真土匪被槍死者十餘。城隍廟聽稗說者聚殲焉。五月癸亥。援兵八百。馱馬載礮。自苗栗至彰城。進攻員林。聞鹿港被攻。分軍來。則遍地瘡痍。火猶未熄。巷多哭聲。日軍齊出。比戶搜查。殺許姓數人。嚴勒

施姓拏施搖。施搖死有餘辜。既禽獻。咸望立決。竟放免。則其姊淫於憲兵部。故也。同時南投宣淫於吳家妾素蘭也。亦然。後且舉素蘭爲街長。挾之遊東京。益無忌憚矣。搜查時。記土匪執戈。家有舊戈者殺之。土匪擊鼓。土匪戴笠。見有鼓有笠者。或殺或囚。於是民間爭毀疑似者。而五月甲子晦。有埔裏社之亂。埔裏社在深山坳。平野數十里。田土墳膏。西至海。二百里強。東入山。至花蓮港。二百里弱。南距斗六。北距大墩。各六十里餘。清已丑置雲林縣治。後徙斗六。置縣丞。日本置支廳。有憲兵部。守備隊。警察署。時各地民衆競起。而清水溪。壓石。鬧爲之首。先攻集集街。集集破。兵半走南投。半走埔裏社。埔裏社城四面山。亦四面敵。齋文書出。即被殺。內外

聲息不通。民衆至頭社。謀攻埔裏社。相去三十里。日兵聞之。欲先  
剿之。亟派軍夫。頭社人入市知之。歸報。北旦人黃銅或云黃較勇敢。  
則率二十七人出伏水社。水社以珠潭名。距埔二十里。有山崖徑  
巖林箐。二十七人伏其中。守備兵憲兵三百人過。二十七人俟其  
近。從林中擊之。日兵出不意。見彈而不見人。相驚亂。死二十餘人。  
大駭退。二十七人轉從林後截之。日兵如在罟。復死三四十人。中  
尉弓削氏中槍死。憲兵亦多死。喊聲殷山谷。敵不測衆寡。四散走  
歸城。則大震。怖於集集之敗。紛擾不知所爲。自支廳會議。守備憲  
兵警察商工六百餘人。乘夜遁。及天明。民衆踵至。入埔裏社不見  
倭。分據清時文武官衙。求倭所往。則在北港溪。溪實坑也。臺灣謂

谷爲坑。有清時舊營堡。林榮泰率隘勇五百在焉。地距埔四十里。日軍欲奔大墩。至此不敢行。民衆偵知。遂出攻之。而榮泰父名超拔。小名烏狗。本林朝棟部下。飭其子效順。首迎日軍。故尙得管隘勇。至是謹助日軍守埔。社人李林基。憤暴政。督衆攻尤力。隘勇與日兵同心堵禦。有施募者。家饒裕。號於衆曰。居先破營者千金。斬馘者五百金。施募家備者田榮。奮而往。從者八十人。至夜薄日營。惟三十人不敢入。田榮獨跳身下坑。入敵堡。遇守門者。即取其頭。守門者攬其足。倭頭滑。田榮以兩手把其耳。盤轉於地。各以短兵刺。田榮刺倭頸。倭亦刺其腰。乘拔刀時。兩人手鬆。各走開。田榮返。負二傷。視所挾槍。則誤易倭槍也。圍七日。倭益戒心。衆無由入。倭

亦不得出。是時民衆雖敗於鹿港。然皆咎懲翻坐。悞氣不衰。仍據南路各地。自山迄沿海。乘夜舂火藥。蒐軍實。多蠕蠕欲動。宜蘭鼎底孟之衆。亦溢出攻屯軍。日軍惴惴自守。不能遏。鳳山之徒。時時跳梁。林小貓既約和。陽不與知。亦無力檢攝他部。已亂未亂地方。咸摩厲以須。全臺有虹潰之憂。於是總督府亟檄新竹苗栗軍。齊援臺中。至彰化見無警。越六月乙丑朔。進員林。礮隊當先。騎兵繼進。步兵夾伏。槍礮大震。匪徒散。遂進克北斗。越二日。次刺桐巷。越日克斗六。斗六屯衆本無據地意。祇爲日軍全退。恐姦痕乘機肆掠。故留維持地方。既覘日軍來。則不願浪戰貽殃。於是整隊歸大坪。日軍之南下也。惟員林北斗小有戰事。及至起事之斗六。反無

阻斗六人鑿於庵古坑之禍。兵未至。多已逃匿。日本官吏兵士。懲前車之覆。入街後。捕拿株連。焚燬亦輕。於是約嘉義會師。大埔林師共有二千人。不敷分布。猶未能整隊入山。而埔裏社之衆。圍北港坑。既七日。亦已懈。又無衝鋒陷陳。能率多人入險破敵。如陳發者。以爲之倡。惟欲困敵。以俟其絕糧。迨其糧絕。而供應圍衆之人亦已倦。於是相繼散歸。民衆既散。日軍伏猶未知。有山頭熟番。見山寮空無人。以告隘勇。轉報日人。日人喜得更生。以隘勇爲前導。入埔裏街。派街民供飯漿糧米。蓋已饑欲死矣。歷叙七日困苦。况則羣臥泥塗中。上無蔽。下無藉。警無以眠。食無以炊。水無以飲。見走獸。聞啼鳥。則疑敵至。見山頭樹色。疑人影。形容黎藁。遍體瘴溼。

相對如鬼。既出險。而山外援軍至。則圍殺施慕家。並李林基家。李林基走。妻徐氏挾槍門焉。兵入。殪二人。擊傷數人。兵火其廬。徐氏出幼子。自縊死。日軍復遠近搜捕。焚燬村社。黃銅等走北窟。北窟峯高插天。下憑深潭。日軍不能攻。埔裏社本番城。康熙迄乾隆。禁漢人入墾。嘉慶時猶爲空山。道光後弛禁。曠壤日闢。孳養蕃息。垂六十年而庶。至是凋殘矣。自六月迄七月。恢復各地。南北軍事。不遑寧居。官民俱苦之。八月復修民政。則議招撫大坪。許以不死。大坪頂張考等要二事。一勿屯山上軍。二勿殺山中民。日官議不可。再遣人往。不敢入。九月招山下人復業。十月禁山內山外交易。於是十一月乙卯。二十日大坪頂民衆。負槍齊出屯斗六市外。截收民

第九

間所應納官租。設局近郊。傳檄四方。歷數不法罪狀。其文猥長不足錄。其略曰。焚殺淫掠者兵也。騷擾室家者警也。培克聚斂者吏丁也。願與縱惡者敵。我兄弟也。大好男兒。死猶生也。守備隊見其衆。勢洶洶。不敢問。徵收畢。衆歸山。官吏盡拘納租者治罪。重輸始釋。十二月壬戌朔。日軍復爲入穴搗巢計。鳩附近兵。募鄉導。取閒道。近山民無應者。而黃選本匪徒。假大坪勢。勒索中埤庄。籃仔頭庄。助饗。中埤人啣之者。即應募。避正路。陷穿椽棧。引從復谷。迢遞中。披籐斬竹行。夜至大坪頂。大坪人已遷部庭尾。時沍寒解嚴。守寮者僅十四人。伏寮燒炬賭博。酣呼中聞竹戛戛聲。有疑者。曰聽之。竹有聲。或謾曰。竹聲。牛摩癢耳。既而如熱爆竹聲。犬狂吠。曰得

毋無毛鬼者來乎。今夜不出哨。奈何。則應曰。禿驢焉敢來。其與虎借膽也。言未畢。而槍鳴矣。則倭已割竹林入矣。十四人者。卽拏槍從寮後越山去。日兵入。見無人。卽驚疑。亂搜至天明。不敢留。從原道歸。大隊從正道歸。遇打穀者。打穀皆山民。出有槍。結隊行。遇兵不可走。則截而奮擊。而部庭尾民衆。得十四人報。驅而出。亦追擊。前後夾攻。山民捷跳如猿狖。日兵皆革鞞。不習山。走輒踣。東倚西角。悉坑之。有生禽者。一隊奔樟湖。亡六十餘人。奔竹廣坑。亡三十。奔營榛籠。亡七十。餘從原道者。歸斗六。狼狽無人色。奔散者。村人導之歸。旣大敗。事不可已。電臺中及臺北索援。於是罄中路守備軍。并南路五千人。越七日乙卯。會師斗六。分四路上山。前敗者知山

徑爲前導。新軍蟻傳進。工兵隊負鋤。各鼓勇而登。大坪民衆。規軍勢浩大。知不敵。先已徙入內山。并部庭山亦不居。而置哨寮焉。日軍至大坪。不遇匪徒。所遺茅屋炊竈。不復焚燬。因而駐軍其中。白山上山下至斗六。設三站以通電信接濟。然不敢逾大坪而深入。惟於山四旁設營。時出搜山。見廬舍則燒。見人則殺。或日殺數十人。或捕而坑於夜間。於是山下人咸悔爲其鄉導。而深山之匪徒。反從閒道以出劫。或擄導倭村人以勒贖。獲日兵。或罄其一目放還。其猖獗如此。方日軍之駐大坪也。戒備頗嚴。軍容亦盛。初無瑕隙可窺。既而各地土匪騷張。各守備隊回防原地。惟斗六守備兵駐大坪。而南投守備兵駐斗六。柯鐵等覘其弱。則集衆約期。

分途出劫。遂於十二月庚辰夜。夜十九先殺其守路兵。即趣向日營。大聲吶喊。衆槍齊發。日軍夢中驚起。不知所措。或中彈殞。或欲發槍。而衆已突入。遂奔下山。或死於路。日既晏。齊集山下。而斗六之援軍至。柯鐵等收其輜重。再入山。是役也。日軍損失無多。易於振迅。傷者還斗六。柯鐵衆既去。山下人來報守備軍。合援軍。即復進屯山上。越明年丁酉春。日軍益復經營山中。爲持久計。操畚負。樹柵築路。山上夷險增隘。儲糧糴。益戍兵。或架板屋而居。守備隊。憲兵部。警察署。分三處爲犄角。如備大敵。當丙申丁酉之交。荏苒伏莽。斬木揭竿而起者。處處皆是。日軍到輒散。去輒聚。剿殺則不懼。招誘則不信。治之無術。日本政府遂有退還臺灣之意。清廷

方拮据籌償遼東。無力更贖臺灣。臺灣富紳林維源。清時頗助軍需。賜部郎。後兼授帮辦大臣。避地居廈門。清舉人施棻字悅秋。有文譽。聲氣廣。前此以清丈田畝。怫彰化縣令意。適施九段聚眾抗官。坐株連。爲劉巡撫奏革廩生通緝。乃改今名。納國子監。登癸己賢書。時避地在晉江。遂往說林維源。則許捐資四百萬。按諸全臺富室。又可得數百萬。清廷費帑。不過千餘萬。由英總領事居間。總理各國衙門聞於朝。清廷詢於兩廣總督李鴻章。鴻章謂得之不能守。形勢緊要。不比遼東。議不可罷。於是日本仍壹意治臺灣。頗重視臺灣人街長庄長。以招徠土匪。稍稍收効矣。而大坪民則以日本屢殺降。不受齶糜。抗如故。先是柯鐵劫日營有獲。衆置酒賀。

張考弗之善。謂少年輕率啓敵。使敵知所備以善後。而我無後圖。非計也。且亟戰則疲。利鋒易斲。區區山地。內無羽翼。外無響應。豈能支強大敵。朝夕紆死而已。而可以戰爲戲。以一勝爲喜乎。闢草萊。營商工。通山澤之貨。彼來我去。彼去我來。相機待時。可也。乃戒柯鐵毋妄動。戒黃選毋下山作賊。於是分住於數山。山又分數處。多結虛寮。不常厥居。久之。日軍漸懈。守備兵亦漸分。山中惟早暮一巡邏。然見山人輒殺。大坪民蓄實力又一年。視日營終如鯁在喉。乃吹號集衆會議。衆曰可矣。於是爲大規模之戰。丁酉十一月甲午夜。初九夜山民齊裹火藥火具。先射火鼠。次噴火筒。擲火球。烈燄撼山。照燭山谷。日營無不受火。日軍夜中不能作戰。憲兵守備

警察紛紛奔下山。山頭萬火齊明。山半暗處多設伏。日軍或死於火。或遇伏中槍。或顛谷死。回視山上棚柵。悉在火中。天明日兵至斗六。喪亡過半。柯鐵等仍據大坪。就日營而駐。且游奕下山矣。十一月庚子望。民衆紮至林杞埔。縱橫三十餘里。斗六日軍亦鳩遠近兵八百餘。合原駐兵共千有四百。轟巨礮爲威。迴環出隊游奕。衆如數千。民衆終不退。日軍計不戰。斗六不得居。十一月癸卯八十乃大掠民夫。昇礮火軍糧。分途而出。前鋒相交。頗有殺傷。民衆歛聚山下。於是日軍進。遂大戰。殺傷相當。輦重民夫。匍匐避彈行。民衆戰自東。日軍戰自西。民衆歸山。日軍亦歸斗六。民夫逃者。遇大坪衆。輒指路免之。戰既畢。路復通。而四方土匪。則競借大坪山

名。到處剽掠。日軍不過問。臺南路復梗。柯鐵等既復大坪。則頗爲久長計。戊戌春。約附近村。計畝納稅。牛會頭。行旅以擔納錢。相戒不劫奪。行人被掠者還之。旁近響應。山頭飄揚黃龍旗。旗署清光緒二十四年月日云云。是年割臺已歷四載矣。清國時事日非。德意志兵據膠州灣。日本依約退旅順。而俄羅斯據旅順。退威海。而英吉利據威海。藉詞均勢。復強租九龍地。法蘭西強租廣州灣。意大利亦覬三門灣。清國幾不國矣。臺灣黠者。識時務者。多已歸心日本。鄙故國。惟愚民感念舊恩。寬大不置。健者且軼於軌外。或激而爲匪。大坪以外皆是也。戊戌夏。大坪之勢愈張。時到各地借糧。自山至海。備其聲。富室苦之。日兵與戰不能勝。懲往年之敗。戰

亦不敢近山。六月乙酉。初三有報土匪駐頭辨坑者。坑之壓。距大墩十里。縣內憲兵守備兵。馳往禦之。至則被圍。床中。床有竹林爲固。土匪縱火焚之。奔而出。被槍刃。傷數十人。亡十三人。土匪則吹噓嗚嗚去。臺中縣知事。皇遽躬至各處。勸聯鄉清壓以備患。自是而合壓爲區之制行。而六月壬寅。二十全臺洪水爲災。南北路山潦大發。中路山崩川溢。濁水溪淹沒田園民居百里。大肚溪沒七八十里。淫雨滂沛。民多溺死餓死。無家者流而爲匪。土匪益多。當是時日軍益嚴搜軍器。山內乏槍械。無從購。則由海邊人購之清國。九月泉州船捆載大宗至麥寮西港。約大坪人往運。道由埔心。埔心壓距大坪五十餘里。距西螺八里。張姓呂姓領二百餘人。先期

茅

約埔心。壓長備午殮。壓長則往報西螺街憲兵。憲兵星夜請援。日午而大坪民三百人至。薛食將行。壓長勸攻西螺堡。曰：人衆如此，而不一逞，何爲乎？衆曰：藥彈不多，奈何？曰：徐之，願有以助。既而西螺憲兵出。壓長亦報大坪人。張姓者謂呂姓曰：君嗜煙體羸，可攜隊去。敵來，我自當之。呂姓者引六十餘人行。未一里，遇憲兵。憲兵祇十餘人，伏諸岸而擊。呂姓隊應之。不多時，而憲兵隊長中槍。呂姓者亦中槍。而張姓之隊至，見敵寡，欲禽之。憲兵竄入附近村。村人分匿之。日暮而斗六援兵至，七十餘。刺桐巷援兵至，六十餘。大坪衆已去。尋憲兵隊長，則爬入箒中死焉。於是欲拿埔心壓長。時土匪蜂午，結隊行，輒自號大坪人。大坪之名震中路。覓衣博袖，游

宴


揚於市。或短衣小笠。急則斂衿露刃。而槍翹然舉矣。兵警肆威於衆。顧而咳曰。土匪至。則狂走。然自是竟已亥。無大戰事。土匪入市街。兵至亦去。小衝突。不可悉紀。已亥春。總督府上京。議院劾其隕國防軍於土匪。辱國損威。已亥夏。總督府返臺。集地方長官議。亦悟剛猛不可施。雜施陰柔術。以收成功。先是鳳山和林小貓。以敵體行。劃界不侵。地方安之。小貓不輕出。無隙可乘。久之。小貓以爲無虞。爰爲母稱壽。大張筵。日官吏亦往賀。得覘虛實。越日夜半。日軍分兩路。草山入。而覆其家。分途剿殺黨徒。駢及賀客。臺北地方。則撫陳秋菊。而攻簡大獅。當二人盛時。日本奉若驕子。秋菊列隊入城。祭天后宮。警察拘人。得簡太師刺。立免之。太師大獅名也。既

不堪其侮。乃陰謀出不意攻之。大獅散衆走廈門。舊部往從之。遷居同安。頗償事。後二年。日兵會清官。拏回處死。外國羣非清國不能保全國事。犯辱。己亥冬。日官專撫大坪民。初日士白井子澄。故臺灣總督桂太郎客也。遊於臺。喜交文人。稔知臺灣疾苦。亦曉利害。言於臺灣長官曰。深山窮谷耕墾之民。勝之不武。不勝招徠。撫之善。總督府及民政長官。已知兵不可逞。從之。白井子澄自臺北至臺中。縣示意。是時臺灣設三縣。轄數十署。署比日本一郡。郡小縣大。臺中縣知事木下周一。欲黷武而不能。不得已亦從之。白井子澄至斗六署。集文武官議。挾街長及各庄長。并官吏。招所識諸生黃紹謨等。同行至大坪頂。大坪丁壯尙洶洶。諸耆老已厭事。議

給匪首金。俾安生業。餘者散。約小坪頂聽設官。以大坪頂爲緩衝地。白井諸人往返三次。於是撫事成。遂大會帳飲於大坪內桶頭山。山上下撤武備。往來出入復故。未幾。白井子澄歸東京。官吏叵測。命偵探四出。刺起事人所在。各處騷然。迨率軍掩捕。則張呂赤等已遁福州。柯鐵等已入深山。陳舫等已歸刺桐巷。被警察監視。年將八十矣。其他各地就撫之人。則死於辛丑四月某日。記是十八大掃除之難。大掃除者。約臺北臺南臺中歸順人。同一日會飲各地。方各區各公所。將戮者予紅花。餘佩白花。未及席。圍而阮之。亂槍中。惟斗六張呂良匿短槍奮而起。報殺兩人。一警部。一軍曹也。他皆植立待斃。倖免者千百之一二。則素以財結日人者也。亦有



無辜死者。死者家屬。多驅之流離遠方。他里霧區長李世昌。爲出力說降之人。見之暈於地。自求槍決。堅不回家。日人扶之歸。辭去區長。先是地方編有土匪籍。免征役。愚民多承之。至是多死。後五年丙午有大討伐。大討伐者。勦生番者也。



卷之六



國家圖書館



002462142



籍